

LE MERAVJE D'SAN STEVO

I

San Stevo, as dis, c'a l'è m'paisòtin
Ficà lagiù, n't'na tana al fond d'un pòss,
Che l'sol ai lô calo giù n't'un cavagnin
Nen tuti i di... ma quand c'a fioca rôss.

Cherdie pa, son ciance d'nostri amis
C'a parlo mal, perché la verità
L'è còsta: che San Stevo a l'è n'pais
C'a smia quasi quasi 'na sità.

*Viva l'travai
C'a cessa mai
Per fè l'bon vin
C'a fa tant bin.
Bate le man
Al paisan
Bate le man
Viva l'Italia e j'Italian.*

II

J'è dle contrà c'a van da sima al fond,
Con j'uss c'a guardo fora d'sà e d'là.
San Stevo a l'è l'pi bel pais del mond,
Con tute quante le comodità.

La ferovia propi lì a dôi pas,
Servissi d'auto còme n't'le sità.
La lea d'le gasie per andè a spass
Ai manca niente, a j'è tut lon c'ai va.

*La freisa ancheui
Cantôma fieui,
Cantran doman,
Côi c'ai saran.
Viva l'dosset
Col bon vinet,
Viva l'dosset,
Viva la festa del barlet.*

III

J'è d'bei palass con i so marciapè
La luce elettrica an tute le strà.
L'acqua potabil... prest a dev rivè,
A j'è aucor nen la "Ponti" ...ma vnirà.
Na bela piassa con so monument
Na cesa granda pi che l'dom d'Milan
L'teatro neuw, na tôr c'a sfida i vent
Spassin con la divisa e l'ciapa can.

*Viva l'bon pan,
La melia e l'gran,
Richesse a son
D'nostra Nassion.
Son gloria e onor
D'l'agricoltôr
Son gloria e onor
Viva l'barbera e l'bon umor*

IV

Ma tut loli l'è niente, a j'è d'aut mei
A j'è l'famôs moscato, col bon vin
C'ai ciâmo per lo pí "Champagne" d'Canei,
Ma l'è d'San Stevo pur e genuin.

Famôs al punto, che (la storia a dis)
Per un decret, ai Duca del Monfrà
L'avia l'privilege l'nost pais
D'mandeine tuti j'ani 'na carà.

*L'moscato fin
L'è l're d'j vin
An tut el mond
J'é pa l'second
El vin del Re
Bsogna cantè
El vin del Re
Viva l'moscato, viva Noè.*

In occasione delle "Feste Vendemmiali", di Alba

S. STEFANO BELBO, 16 Settembre 1928.